

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 30. Abrëll 2021

Här President,


Sou wéi d'Chambersreglement et virgesäit, bieden ech lech, dës parlamentaresch Fro un den Här Schoulminister weiderzeleeden.

An der Äntwert op meng parlamentaresch Fro Nr. 3797 schreift den Här Minister, dass aktuell 163 Schüler, déi hire Wunnsätz am Ausland hunn, eng Grondschoul vun der Lëtzebuenger internationaler Schouloffter besichen.

An deem Kontext wollt ech nach eng Rei weider Froe stellen:

- 1) Wéi vill Schüler sinn aktuell an de Grondschoule vun der Lëtzebuenger internationaler Schouloffter ageschriwwen? Wéi verdeelt sech dës Zuel op déi verschidde Schoulen? Wéi verdeelen sech déi 163 Schüler, déi hire Wunnsätz am Ausland hunn, op déi verschidde Schoulen?
- 2) Bei de Grondschoulen entscheet de Schäfferot vun der betreffener Gemeng, ob ee Kand aus enger anerer Gemeng an hir Schoul opgeholl gëtt. Dëst kann awer nëmmen op Grond vun enger besonnescher Motivatioun geschéien. Wien hält déi Entscheidung am Fall vun de Grondschoulen aus der Lëtzebuenger internationaler Schouloffter? Wéi eng Konditioune mussen erfëllt sinn?

Mat déiwem Respekt



Fred Keup
Deputéierten

Äntwert vum Minister fir Educatioun, Kanner a Jugend op d'parlamentaresch Fro Nr. 4190 vum honorabelen Här Deputéierte Fred Keup

Ad 1)

Aktuell sinn 1.487 Schüler an enger Lëtzebuenger internationaler Grondschoul ageschriwwen. Si verdeelen sech folgendermoossen op déi ënnerschiddlech Schoulen:

Lëtzebuenger international Grondschoul	Schülerunzuel
École internationale de Differdange et Esch-sur-Alzette	531
École internationale de Junglinster	291
École internationale de Mondorf-les-Bains	125
École internationale Edward Steichen	118
International School Michel Lucius	422
TOTAL	1.487

Vun dese 1.487 Schüler hunn zum aktuellen Zäitpunkt 166 hire Wunnsätz am Ausland. Am Mäerz 2021, wéi d'Recherchen fir d'parlamentaresch Fro Nr. 3797 gemaach goufen, waren et dräi Schüler manner. Dësen Ënnerscheid erkläert sech duerch eng nei Inscriptioun an enger Lëtzebuenger international Grondschoul an duerch de Wiessel vum Wunnsätz vun zwee Schüler.

Dës 166 Schüler verdeelen sech folgendermoossen op déi ënnerschiddlech Schoulen:

Lëtzebuenger international Grondschoul	Schülerunzuel mat Wunnsätz am Ausland
École internationale de Differdange et Esch-sur-Alzette	91
École internationale de Junglinster	39
École internationale de Mondorf-les-Bains	19
École internationale Edward Steichen	8
International School Michel Lucius	9
TOTAL	166

Ad 2)

Bei den internationale Schoulen ass et d'Direktioun vun der Schoul, déi d'Décisioun hëllt. Dobäi gi verschidden Aspekter berücksichtegt, wéi zum Beispill d'Zuel vun den disponibele Plazen an deenen ënnerschiddleche Sproochesektiounen, oder och de Fait ob schonn e Brudder oder eng Schwëster aus deem selwechten Elterenhaus an der Schoul ageschriwwen ass.